

GARIS PANDUAN PEMILIHAN ANGGOTA JAWATANKUASA KARIAH BAGI SESUATU KARIAH MASJID DALAM NEGERI SELANGOR

“Hanyasanya yang layak memakmurkan (menghidupkan) masjid-masjid Allah itu ialah orang-orang yang beriman kepada Allah dan hari akhirat serta mendirikan sembahyang dan menunaikan zakat dan tidak takut melainkan kepada Allah, (dengan adanya sifat-sifat yang tersebut) maka adalah diharapkan mereka menjadi dari golongan yang mendapat petunjuk.”

(At-Taubah:18)

NAMA

1. Garis Panduan ini boleh dinamakan Garis Panduan Pemilihan Anggota Jawatankuasa Kariah Bagi Sesuatu Kariah Masjid Dalam Negeri Selangor.

LATAR BELAKANG

2. Mesyuarat Majlis Agama Islam Selangor (Majlis) Bil. 4/ 2015 yang telah bersidang pada 8 September 2015 telah memutuskan supaya Garis Panduan ini menggantikan Tatacara Pencalonan Pegawai Masjid dan Jawatankuasa Kariah Negeri Selangor Sesi 2012-2015 yang dikeluarkan pada 16 Januari 2012.

TUJUAN

3. Garis Panduan ini diwujudkan bertujuan untuk:

- (a) melaksanakan kehendak dan maksud Enakmen Pentadbiran Agama Islam (Negeri Selangor) 2003 di bawah seksyen 104;
- (b) melaksanakan kehendak dan maksud Kaedah-Kaedah Pegawai Masjid dan Jawatankuasa Kariah (Negeri Selangor) 1995 di bawah subkaedah 6(4) dan kaedah 27; dan
- (c) merupakan rujukan mengenai tatacara pemilihan anggota Jawatankuasa Kariah bagi sesuatu kariah masjid dalam Negeri Selangor.

PELAKSANAAN

4. **Kriteria umum pemilihan calon:**

- (a) Syarat kelayakan.

Setiap calon yang dipilih menjadi anggota Jawatankuasa Kariah bagi sesuatu kariah masjid dalam Negeri Selangor hendaklah memenuhi syarat-syarat berikut:

**GARIS PANDUAN PEMILIHAN ANGGOTA JAWATANKUASA KARIAH
BAGI SESUATU KARIAH MASJID DALAM NEGERI SELANGOR**

- i. berumur tidak kurang daripada 21 tahun dan tidak melebihi 65 tahun;
- ii. beragama Islam, warganegara Malaysia dan tinggal bermastautin atau bermukim serta berdaftar sebagai ahli kariah dalam kariah masjid tersebut;
- iii. berpegang dan beramal dengan ajaran Ahli Sunnah Wal Jamaah dari segi akidah, syariah dan akhlak;
- iv. mempunyai pengetahuan agama Islam, berakhlak mulia dan melibatkan diri di dalam aktiviti masjid;
- v. boleh membaca, menulis dan mengira;
- vi. sihat tubuh badan dan mental;
- vii. mempunyai daya kepimpinan;
- viii. bersedia mematuhi Enakmen Pentadbiran Agama Islam (Negeri Selangor) 2003 dan Kaedah-Kaedah Pegawai Masjid dan Jawatankuasa Kariah (Negeri Selangor) 1995 serta lain-lain garis panduan berkaitan dengan pengurusan masjid dan surau; dan
- ix. sentiasa menjalin hubungan baik dengan ahli kariah.

(b) Gugur kelayakan.

Calon yang mempunyai kriteria seperti yang berikut adalah tidak layak untuk dipilih menjadi anggota Jawatankuasa Kariah sesuatu kariah masjid dalam Negeri Selangor:

- i. menganggotai mana-mana jawatan Pegawai Masjid dan anggota Jawatankuasa Kariah bagi masjid yang lain;
- ii. disabitkan dengan kesalahan jenayah dalam mana-mana mahkamah sivil atau mahkamah Syariah;
- iii. ditamatkan perkhidmatan atau dipecat oleh Majlis;
- iv. diisytiharkan bankrap; atau

seseorang yang dilantik sebagai penasihat bagi tiap-tiap masjid dalam mukim dan kampung yang berkenaan.

5. Kriteria tambahan calon Setiausaha:

- (a) hendaklah memiliki pengalaman dalam bidang pengurusan dan pentadbiran; dan/atau
- (b) mampu berkomunikasi dengan baik.

6. Kriteria tambahan calon Bendahari:

- (a) memiliki Sijil Pelajaran Malaysia (SPM) atau sijil-sijil yang berkaitan dengan urusan perakaunan; dan/atau
- (b) memiliki pengalaman atau berkemahiran dalam bidang Pengurusan Kewangan.

7. Kriteria tambahan calon pemeriksa kira-kira:

- (a) memiliki Sijil Pelajaran Malaysia (SPM) atau sijil-sijil yang berkaitan dengan urusan perakaunan; dan/atau
- (b) memiliki pengalaman atau berkemahiran dalam bidang Pengurusan Kewangan.

8. Tempoh jawatan anggota Jawatankuasa Kariah

Mana-mana anggota Jawatankuasa Kariah hendaklah memegang jawatan selama tempoh tiga tahun dari tarikh pelantikannya dan boleh dilantik semula.

9. Mesyuarat Agung Khas Pemilihan

- (a) Anggota Jawatankuasa Kariah boleh dipilih melalui Mesyuarat Agung Khas Pemilihan anggota Jawatankuasa Kariah berdasarkan kriteria-kriteria yang telah dinyatakan dalam Garis Panduan ini dan dipengerusikan oleh Nazir masjid berkenaan berdasarkan subkaedah 27(2) Kaedah-Kaedah Pegawai Masjid dan Jawatankuasa Kariah (Negeri Selangor) 1995.
- (b) Pegawai Tadbir Agama Daerah atau wakilnya boleh menyelia urusan tatacara pemilihan sebagaimana diperuntukkan di dalam subkaedah 7(1) Kaedah-Kaedah Pegawai Masjid dan Jawatankuasa Kariah (Negeri Selangor) 1995.
- (c) Kaedah pemilihan anggota Jawatankuasa Kariah hendaklah dibuat secara **sebulat suara atau lebih suara ahli kariah** yang hadir seperti mana yang diperuntukkan dalam subkaedah 27(2) Kaedah-Kaedah Pegawai Masjid dan Jawatankuasa Kariah (Negeri Selangor) 1995.

- (d) Setiausaha Masjid hendaklah mengeluarkan notis bertulis kepada ahli kariah masjid dan salinan kepada Pegawai Tadbir Agama Daerah sekurang-kurangnya 14 hari sebelum tarikh Mesyuarat Agung Khas Pemilihan anggota Jawatankuasa Kariah diadakan.
- (e) Pegawai Masjid hendaklah membuat hebahan seperti memasang kain rentang, membuat pengumuman pada 2 kali solat Jumaat dan apa jua bentuk mekanisma hebahan yang sesuai bagi memastikan kehadiran ahli kariah ke Mesyuarat Agung Khas Pemilihan anggota Jawatankuasa Kariah,
- (f) Ahli kariah yang hadir hendaklah seseorang yang bermastautin atau bermukim serta berdaftar sebagai ahli kariah dalam kariah masjid tersebut.
- (g) Agenda mesyuarat adalah seperti yang berikut:
 - i. bacaan surah Al-Fatihah dan doa selamat;
 - ii. ucapan Pengerusi;
 - iii. taklimat khas tatacara pemilihan oleh Pejabat Agama Islam Daerah;
 - iv. sesi pemilihan; dan
 - v. penangguhan mesyuarat dengan bacaan surah al-Asr.

Bilangan anggota Jawatankuasa Kariah bagi sesuatu kariah masjid dalam Negeri Selangor yang dipilih adalah seperti yang berikut:

- i. Seorang Setiausaha;
 - ii. Seorang Penolong Setiausaha;
 - iii. Seorang Bendahari;
 - iv. 6 orang AJK (termasuk seorang wanita);
 - v. Seorang Wakil Pemuda;
 - vi. Seorang Wakil Wanita; dan
 - vii. 2 orang Pemeriksa Kira-Kira.
- (h) Setiausaha Masjid hendaklah mengisi **Borang Pemilihan Anggota Jawatankuasa Kariah Sesuatu Masjid Dalam Negeri Selangor Yang Diputuskan Dalam Mesyuarat Agung Khas Pemilihan** dan menyerahkan salinan minit Mesyuarat Agung Khas Pemilihan anggota Jawatankuasa Kariah kepada Setiausaha Jawatankuasa Kariah MAIS dalam tempoh 5 hari bekerja
- Muka Surat 4 daripada 5

selepas Mesyuarat Agung Khas Pemilihan anggota Jawatankuasa Kariah diadakan melalui Pejabat Agama Islam Daerah.

10. Mesyuarat Jawatankuasa Kariah MAIS

Mesyuarat ini dipengerusikan oleh Timbalan Pengerusi Majlis, yang berperanan bagi menyemak dan mengesahkan anggota Jawatankuasa Kariah yang telah dipilih kepada Mesyuarat Majlis Agama Islam Selangor.

11. Mesyuarat Majlis Agama Islam Selangor

- i. Mesyuarat ini dipengerusikan oleh Pengerusi Majlis, berperanan bagi meluluskan senarai nama-nama anggota Jawatankuasa Kariah untuk tujuan pelantikan.
- ii. Surat pelantikan kepada anggota Jawatankuasa Kariah akan dikeluarkan oleh Majlis.

PENGECUALIAN

12. Walau apa pun yang ditentukan oleh garis panduan ini, Majlis boleh dalam keadaan tertentu yang difikirkan perlu, mengecualikan mana-mana orang atau peruntukan yang ditentukan oleh garis panduan ini.

TARIKH KUAT KUASA

13. Garis Panduan ini mula berkuat kuasa mulai 15 September 2015.

PEMBATALAN

14. Dengan berkuat kuasanya garis panduan ini maka Tatacara Pencalonan Pegawai Masjid Dan Jawatankuasa Kariah Masjid- Masjid Negeri Selangor sesi 2012-2015 adalah **dibatalkan**.

t.t

(DATO' BAKHTIAR BIN HUSSIN)

Setiausaha

Majlis Agama Islam Selangor

Tarikh : 11 September 2015